

D'r awste oet 't köd (slot)

(de oudste uit het gezin)

Achter in de wei sjtóng 't bakkes en dao vónge veer naoderhand nog e sessele, 'n hièp, e biele, 'n zich mit d'r zichtehaok, 'n aw zeisel en nog get iezere kiele mit eine houte hamer, eine paotsjtèk en d'r mèshaok. Aan de moer hóng d'r pin en de sjpanketting veur de geit. In d'r hook stóng eine roadkopere vèrkeskaetel en d'r naeve loog 't brietselmasjen, mèh dat waor gans berosd.

Achter taege 't bakkes aan sjtóng nog 'n sjansemiet en aan d'r ziekant ónger 't aafdaak loog nog d'r houwblok en dao waor ouch d'r vèrkesjal.

D'r noonk Sjang kreeg e sjtök land en dae haw gaer de hóndskaar, want die van häöm waor gans kapot, en dae nóm zich ouch d'r bagketraog mit en dae haw d'r pap zelf sjus gaer gehad.

De tant Merie erfde de muèbele, de kleijer, d'r porsjelein, de laepele, versjètte, metser en alle anger keukegereidsjap, zelfs nog de auw vlaplate en e paar kepotte häörkes um doorgesjneje èppel en proeme op te druège, nóm ze zich nog mit.

Wiejer kreeg zie 't lievend good, de eike wesjtaofel mit eine sjpegel gans vol sjpeik, de lampetsjtèl en d'r pispot.

Die wesjtaofel waor d'r trots van de oma gewaes, zie zag ummer " d'r lavabo", want die haw häor mam nog gególle op eine verkoup bie pesjtoar dinges, wie dae gesjórve waor.

De tant Berb haw 't laeg laot, dat wilt zegke, die kreeg veer hónderd en vieftig gölle, en es aandinke haw die 't kruts van de zerk van opa .

D'r pap meinde zich gans get, want noe haw hae ouch 'n eige hoes, mèh wie de ièrsjte raegebuj kaom, haw hae gein pötjes en tobbe genóg um uèveral te zètte .

Ze hawe hun bèd op 'ne anger plaatsj gezat es de oma en doe mós de mam zich d'r perrepluj pagke um tenminste neet naat te waere in ge bèd.

En de mam die al ummer gezag haw dat ze dae auwe kraom neet wól, vloog taege d'r pap oet en sjrièwde: " Es doe mörrigge neet zörge dat 't daak gemak wuèrd, dan gaon ich laope, dat mós doe mèr weite, doe wóls jao ouch die auw brak hóbbe."

Wo veer kinger sjleepe waor 't al neet vööl baeter, dao leep de rotzooj langs d'r tepieët aaf.

's Angerendaags haolde d'r pap zich bie d'r boer Saovelaer 'n hónderd van die auw hollesje panne en begoos 't daak te reparere. Mèh dat waore

panne die gans gesjötteld waore of sjeif en daoveur haw hae die ouch veur niks gekrege. Die pasde neet bie die platte panne op oos hoos en doe haat d'r pap die op de twiè ungersjte rieje gelag en die dao aafkaome die pasde waal tössje die panne hoagerop.

En ich mós die panne baove aan inlègke, ómdat ich neet sjwaor waor, want d'r pap dórsj neet zoa hoag op te kroepe, bang dat hae d'r door zou valle. Hae haw hie en dao waal nog 'n daaklat mótte vernujje, mèh wie 't aovend waor, doe vreef hae zich in de heng en zag taegde de mam: "Zus te noe maedsje, d'r Pie kint ouch alles, ich zal dizze zomer 'n deil póppe make van kaoresjtruè en dan vraog ich d'r noonk Sjang of dae mich hulp 't daak opnuj te póppe, want dao is dat eine vakman in.

Wie ich e jaor of twelf waor haw d'r pap ummer werk veur mich. Mós ich de geit neet oetlaote, da mós ich d'r sjtal oetmèste, de knienskouwe zuver make, zoermelk zeuke veur de knien, de weije mit zuver make aan 't veurjaor, kroate mit dunne en hakke en in 't naojaor mit oetdoon en biejein vare mit de sjoepkar nao de miet en weit ich wat nog al miè.

De twiè auwste maedjes móste doe op 't klein grut passen en hólpe de mam mit 't speule, 't hoes en de naere oetkaere en zaoterdes móste ze de taofel, de bank en de sjteul mit witte zand sjoere en nog vääol miè.

Gein wónder dat veer 't heim gauw gezeen hawe en direk naodat veer van de sjoal waore, zint veer gauw gaon oetwirke, ich bie eine boer es vèrkesjóng en de maedjes es maat. 't Berpke kaom bie 't hoofd van de sjoal terech, mèh al gauw waor dat 't dao zat, want 't haw mèr eine zóndig vrie in d'r maand en is doe nao e jaor of veer mit eine koelpiet getrouwd en zoot zelf dalig in de klein kinger.

En 't Greetje dat bie eine boer terech kaom, dae de heng neet kós heimhouwte, dat is doe nao de sjtad es winkelmaedsje gaon wirke.

Dat hat zich later eine sjriever op de koel getrouwd.

En ich bin nao e jaor of vief ouch nao de koel gegange en dao verdeende ich óngergróns in 'n waek nog miè es d'r pap in drie waeke bie de boere.

Dré Kickken.